

10. Oktober 2017

**Timersortartut nuna tamakkerlugu unammisartut peqataanerisa taakku sulliviinnut imaluunniit ilinniarnerannut sapinngisamik ajoqqutaasinnaasumik kinguneqaqqunagu qanoq iliorluni timersortartut nuna tamakkerlugu unammisartut atugaat pitsanngorsarneqarsinnaanersut misissoqullugu Naalackersuisut peqquneqarnissaannik Inatsisartut aalajangiiffigisassaattut siunnersuut. Kalaallit Nunaanni Timersortartut Kattuffiat, immikkut kattuffiit kiisalu allat susasaqartut soqutigisaqaqatigiit misissuinermut UKA2018 tikitsinnagu Inatsisartunut agguanneqartussamut peqataatinneqassapput.**

(Inatsisartunut ilassortaq - Nivi Olsen, Demokraatit)

Inatsisartunut ilaasortap Nivi Olsenip siunnersuutaanut qujalluta Siumumiit imaattumik oqaaseqassaagut. Siunnersuuteqartup ujartuiffigaa nunatsinni nuna tamakkerlugu unammisartut atugaasa sutigut pitsanngorsarneqarsinnaanerinik misissuisoqassasoq.

Peqqinnartumik inuuneqarnek allanullu maligassiineq, pinaveersaartitsinerit pingaarnersaraat. Nunanut allanut unammisartut aamma tassaapput avammut sinnerluta timersortartut silarsuaanni kiinnertatuvut, taamaammat apeqquserneqarsinnaanngitsumik tapersersugassaraavut.

Naalackersuisut akissuteqaataani takuneqarsinnaavoq unammiartornermi sulinermi annaasaqaatinut matussusiinnaasumik Naalackersuisut tungaaniit aningaasanik immikkoortitsisoqartartoq, tamakkiisumik atorneqartanngitsunik. Taamaammat apererusunnarpoq periarfissat atuuttut pigisavut periarfissaaneri pillugit tamakkiisumik ilisimatitsisoqartarnersoq? Tassa ima paasillugu atuisut uanilu Naalackersuisut periarfissaareersunut tikkuussinerat ilumut atuisut tamassuma periarfissaaneranik ilisimatinneqartarner-sut, aammalu unammisartut uanilu periarfissiissutigineqartumi sorliit pineqarner-sut assorsuaq soqutiginarpoq immikkut qulaajaaffigissallugit.

Naalackersuisut akissuteqaataanissaaq takuneqarsinnaavoq qaffasissumik timersornermik ingerlatsiutigalutik ilinniakkaminnik ingerlatsisut periarfissai pitsanngorsarneqarsimasut, tamannalu Naalackersuisut aasaq manna immikkut ilinniartut atugai pitsanngorsarniarlugit nalunaarusiorneranni ilanngunneqarsimasoq, qujanarpoq taamaaliortoqarsimammat, pingaarmammi atugassarititaasut ullutsinnut naleqqusartuarneqarnissaat.



Siunnersuuteqartup ugartugai pingaaruteqarmata, apeqqutillu allat uani oqallinnermi pilersinneqartut aallaavigalugit Siumumiit isumaqarpugut ataatsimiitsitaliamut ingerlanneqarnissaa innersuutissagipput, timersornermik ingerlatsissut peqatigiiffii peqatigalugit qulaajaanissaminik periarfissinneqassammat.

Taamak oqaaseqarluta siunnersuutigineqartoq Ilinniartitaanermut, kultureqarnermut, ilisimatusarnermut ilageeqarnermullu ataatsimiitsitaliamut ingerlateqqinneqarnissaa innersuupparput.

Vivian Motzfeldt

Siumut



**SIUMUT**  
**INATSISARTUT**